

四庫全書

史部

欽定四庫全書

史部

文獻通考卷二百八十八

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄監生臣程飛鵬

謄錄監生臣馮堪

欽定四庫全書

文獻通考卷二百八十八

鄱陽馬端臨

貴與著

象緯考十一

二月五星凌犯

晉武帝咸寧四年九月太白當見不見占曰是謂失舍
不有破軍必有亡國是時羊祜表求伐吳上許之五年
十一月兵出太白始夕見西方太康元年平吳太康

八年三月熒惑守心占曰王者惡之太熙元年四月乙酉帝崩

惠帝元康三年四月熒惑守太微六十日占曰諸侯三公謀其上必有斬臣一曰天下亡國是春太白守畢至是百餘日占曰有急令之憂一曰相死又為邊境不安後賈后陷殺太子 六年十月乙未太白晝見 九年六月熒惑守心占曰王者惡之八月熒惑入羽林占曰禁兵大起其後帝見廢為太上皇俄而三王起兵討趙

王倫倫悉遣中軍兵相距累月 永康元年三月中台
星坼太白晝見占曰台星失常三公憂太白晝見為不
臣是月賈后殺太子趙王倫尋廢殺后斬司空張華其
五月熒惑入南斗占曰宰相死兵大起斗又吳分野是
時趙王倫為相明年篡位三王興師誅之泰安二年石
冰破揚州其八月熒惑入箕占曰人主失位兵起明年
趙王倫篡位改元 二年二月太白出西方逆行入東
井占曰國失政大臣為亂時齊王同起兵討趙王倫倫

滅同擁兵不朝專權淫奢明年誅死 永寧元年七月

歲星守虛危占曰有兵憂虛危齊分一曰守虛饑守危
徭役繁多下屈竭辰星入太微占曰為內亂羣臣相殺
太白守右掖門占曰為兵為亂為賊八月戊午填星犯
左執法又犯上相占曰上相憂熒惑守昴占曰趙魏有
災辰星守輿鬼占曰秦有災九月丁未月犯左角占曰
人主憂一曰左衛將軍死天下有兵 泰安二年二月
太白入昴七月熒惑入東井是秋太白守太微占曰天

下擾兵大起國亂上將以兵亡是年冬成都河間攻洛陽八月長沙王奉帝出距二王二年正月東海王越執長沙王又張方又殺之十一月庚辰歲星入月中占曰國有逐相十二月壬寅太白犯月占曰天下有兵三年正月月犯太白熒惑入南斗占同七月左衛將軍陳珍率衆奉帝伐成都王六軍敗績兵逼乘輿時天下盜賊羣起張昌尤盛永興元年七月庚申太白犯角亢經房心歷尾箕九月入南斗占曰犯角天下大戰犯亢

有大兵人君憂入房心為兵喪犯尾箕女主憂一曰天下大亂入南斗有兵喪一曰將軍為亂其所犯守又兗豫幽冀揚州之分野是年七月有蕩陰之役九月王浚殺幽州刺史和演攻鄴鄴潰於是兗豫為天下兵衝陳敏又亂揚土劉元海石勒李雄等並起微賤跨有州郡皇后羊氏數被幽廢皆應也 二年四月丙子太白犯狼星占曰大兵起九月歲星守東井占曰有兵井又秦分野是年荀晞破公師蕃張方破范陽王虓關西諸將

攻河間王顥奔走東海王迎殺之 光熙元年四月太白失行自翼入尾箕占曰太白失行而北是謂反生不
有破軍必有屠城五月汲桑攻鄴魏郡太守馮嵩出戰
大敗桑遂害東燕王騰殺萬餘人焚燒魏時宮室皆盡
其九月丁未熒惑守心占曰王者惡之己亥填星守房
心占曰填守房多禍喪守心國內亂天下赦是時司馬
越專權終以無禮破滅內亂之應也十一月帝崩懷帝
即位大赦天下

懷帝永嘉二年正月庚午太白伏不見二月庚子始晨見東方是謂當見不見占同上其後破軍殺將不可勝數帝崩北庭中夏淪覆三年正月庚子熒惑犯紫微占曰當有野死之王又為火燒宮是時太史令高堂沖奏乘輿宜遷幸不然必無洛陽五年六月劉曜王彌入京都焚燒宮廟執帝歸平陽四年填星久守南斗占曰填星所居久者其國有福是時安東將軍琅邪王始有揚土其年十一月地動陳卓以為是地動之應也

五年十月熒惑守心 六年六月丁卯太白犯太微占
曰兵入天子庭王者惡之七月帝崩於寇庭天下行服
大臨

元帝太興元年七月太白犯南斗占曰吳越有兵大人
憂 二年二月甲申熒惑犯東井占曰兵起貴臣相戮
八月己卯太白犯軒轅大星占曰後宮憂十一月辛巳
月犯熒惑占曰有亂臣 三年五月戊子太白入太微
又犯上將星占曰天子自將上將誅九月太白犯南斗

十月己亥熒惑在東井居五諸侯南踟躕留積三十日
占曰熒惑守井二十日以上大人憂守五諸侯諸侯有
誅者永昌元年三月王敦反攻京師六軍敗績人主謝
過敦殺周顗刁協譙王承甘卓閏十一月帝崩十二月
己未太白入月在斗郭璞曰月屬坎陰府法象也太白
金行而來犯之天意若曰刑理失中自毀其法 四年
十二月丁亥月犯歲星在旁占曰其國兵饑人流亡永
昌初王敦反百姓困於兵革

明帝太寧三年正月熒惑逆行入太微占曰為兵喪王者惡之閏八月帝崩後二年蘇峻反攻焚宮室太后以憂偪崩天子幽劫於石頭城遠近兵亂至四年乃息

成帝咸和六年正月景辰月入南斗占曰有兵是月石勒殺畧婁武進二縣人明年石勒衆又抄畧南涉海虞其十一月熒惑守胃昴占曰趙魏有兵八年七月石勒死石季龍自立是時雖二石僭號而其強弱常占於昴不關太微紫宮也 八年三月己巳月入南斗與六年

占同其年七月石勒死彭彪以譙石生以長安郭權以秦州並歸順於是遣督護喬球率衆救彪彪敗球退又石季龍石斌攻滅生權其七月熒惑入昴占曰胡王死一曰趙地有兵是月石勒死石季龍多所攻沒八月月又犯昴占曰胡不安 九年三月己亥熒惑入輿鬼犯積尸占曰兵在西北有沒軍死將六月八月月又犯昴是時石弘雖襲勒位而石季龍擅威橫暴十一月廢弘自立遂幽殺之 咸康元年二月己亥太白犯昴占曰

兵起歲中旱四月石季龍畧騎至歷陽加司徒王導大
司馬治兵列守衝要是時石季龍又圍襄陽六月旱其
年二月景戌月入昴占曰胡王死八月戊戌熒惑入東
井占曰無兵兵起有兵兵止十一月月犯昴二月乙未
太白入月四月甲午月犯太白 二年正月辛亥月犯
房南第二星八月月又犯昴九月庚寅太白犯南斗占
曰斗為宰相又揚州分金犯之死喪之象其後石虎僭
王攻段遼襲慕容皝不克皝擊破并虜段遼 三年七

月己酉月犯房上星八月熒惑入輿鬼犯積尸甲戌月
犯東井距星九月月犯建星 四年四月己巳七月乙
巳月俱奄太白占曰人君死又為兵人主惡之五月戊
戌熒惑犯右執法占曰大臣死執政憂九月太白又犯
右執法按占曰五星災同金水尤甚十一月戊子太白
犯房上星占曰上相憂 五年四月辛未月犯歲星在
胃占曰國饑人流乙未月犯歲星在昴又犯畢距星占
曰兵起七月己酉月犯房上星占曰將相憂是月庚申

丞相王導薨庾冰代輔政八月太尉郗鑒薨又有沔南
邾城之敗百姓流亡萬餘家六年正月征西大將軍庾
亮薨 六年三月甲辰熒惑犯太微上將星占曰上將
憂四月丁丑熒惑犯右執法占曰執政者憂六月乙亥
月犯牽牛中央星占曰大將憂是時尚書令何充為執
法有譴欲避其咎明年求為中書令其四月景午太白
犯畢距星占曰兵革起一曰女主憂六月乙卯太白犯
軒轅大星占曰女主憂七年三月皇后杜氏崩 七年三

月壬午月犯房四月己丑太白入輿鬼五月太白晝見
八月辛丑月犯輿鬼 八年六月熒惑犯房上第二星
占曰次相憂八月壬寅月犯畢占曰下犯上兵革起十
月月又掩畢大星占同上其建元元年車騎將軍庾冰
薨庾翼大發兵謀伐石季龍專制上流朝廷憚之

康帝建元二年正月壬午太白入昴占曰趙地有兵又
曰天下兵起四月乙酉太白晝見是年石季龍殺其子
邃遣將寇沒狄道及屯薊東謀慕容皝 三年歲星犯

天關安西將軍庾翼與兄冰書曰歲星犯天關占曰關梁當分比來江東無他故江道亦不艱難而石季龍頻年再閉關不通信使此便是天公憤憤無皂白之徵也其閏月乙酉太白犯斗占曰為喪天下受爵祿九月帝崩太子立大赦賜爵

穆帝永和元年正月丁丑月入畢占曰兵大起戊寅月犯天關占曰有亂臣更天子之法五月辛巳太白晝見在東井占曰為臣強秦有兵六月辛丑月入太微犯屏

西南星占曰輔臣有免罷者七月八月月皆犯畢占同上巳未月犯輿鬼占曰大臣有誅九月庚戌月又犯畢是年初庾翼在襄陽七月翼疾將終輒以子爰之為荊州刺史代已任爰之尋被廢明年桓溫又輒率衆伐蜀執李勢送至京師蜀本秦地也二年二月壬子月犯房上星四月景戌又犯房上星八月壬申太白犯左執法三年正月壬午月犯南斗第五星占曰將軍死近臣去五月壬申月犯南斗第四星因八魁占曰有兵一

曰有大赦六月月犯東井距星占曰將軍死國有憂戊戌月犯五諸侯占曰諸侯有誅九月庚寅太白犯南斗第五星占曰為喪為兵四年七月景申太白犯左執法甲寅月犯房丁巳入南斗犯第二星乙丑太白犯左執法占悉同上十月甲辰月犯亢占曰兵起將軍死十一月戊戌月犯上將星三年六月大赦是月陳達征壽春敗而還七月氐蜀餘寇反亂益土九月石季龍伐涼州五月征北大將軍褚裒卒四年四月太白入昴是時

戎晉相侵趙地連兵尤甚七月太白犯軒轅占曰在趙及為兵喪甲寅月犯房十月甲戌月犯亢占曰兵起將軍死八月石季龍太子宣殺弟韜宣亦死其十一月戌戌月犯上將星五年正月石季龍僭號稱皇帝尋死

五年四月丁未太白犯東井占曰秦有兵九月戌戌太白犯左角占曰為兵十月月犯昴占曰胡有憂將軍死是年八月褚裒北征兵敗十月關中二十餘壁舉兵內附石遵攻沒南陽十一月冉閔殺石遵又盡殺胡十餘

萬人於是趙魏大亂十二月褚裒薨八年劉顯苻健慕容儁並僭號殷浩北伐敗績見廢六年二月辛酉月犯心大星占曰大人憂又豫州分野也丁丑月犯房占曰將相憂六月己丑月犯昴占同上乙未月犯五諸侯占曰同上七月壬寅月始出西方犯左角占曰大將死一曰天下有兵丁未月犯箕占曰將軍死景寅熒惑犯鉞星占曰大臣有誅八月辛卯月犯左角太白晝見在南斗月犯右執法占並同上是歲司徒蔡謨免為庶人

七年二月太白犯昴占同上三月乙卯熒惑入輿鬼
犯積尸占曰貴人有憂五月乙未熒惑犯軒轅大星占
曰女主憂太白入畢口犯左股占曰將相當之六月乙
亥月犯箕占曰國有兵景子月犯斗丁丑熒惑入太微
犯右執法八月庚午太白犯軒轅戊子太白犯右執法
占悉同上七年劉顯殺石祗及諸將帥山東大亂疾疫
死亡 八年三月戊戌月犯軒轅大星癸丑月入南斗
犯第二星五月犯心星六月癸酉月犯房七月壬子歲

星犯東井距星占曰內亂兵起八月戊戌熒惑入輿鬼
占曰忠臣戮死景辰太白入南斗犯第四星占曰將為
亂一曰丞相免十二月月在東井犯歲星占曰秦饑人
流亡 九年二月乙巳月入南斗第三星三月戊辰月
犯房八月歲星犯輿鬼東南星占曰兵起時帝幼冲母
后專政將相有隙兵革連起慕容儼號攻伐不休

十年正月己卯月蝕昴星占曰趙魏有兵癸酉填星奄
鉞星占曰斧鉞用三月甲申月犯心大星占曰王者惡

之九月辛酉太白犯左執法十一月月奄填星在輿鬼
占曰秦有兵時桓溫伐苻健破姚襄十一年三月辛
亥月奄軒轅占同上四月庚寅月犯牛宿南星占曰國
有憂八月己未太白犯天江占曰河津不通十二年
六月庚子太白晝見在東井占如上己未月犯鉞星八
月癸酉月奄建星九月戊寅熒惑入太微犯西蕃上將
星十一月丁丑熒惑犯太微東蕃上將星十二年十一
月齊城陷執段龕殺三千餘人永和三年鮮卑侵畧河

冀升平元年慕容儁遂據臨漳盡有幽并青冀之地緣
河諸將奔散河津隔絕時權在方伯九服交兵 升平
元年四月壬子太白入輿鬼丁亥月奄井南轅西頭第
三星占曰秦地有兵一曰將死六月戊戌太白晝見在
軫占同上軫是楚分野壬子月犯畢占曰為邊兵七月
辛巳熒惑犯天江占曰河津不通十一月歲星犯房占
曰豫州有災其年五月苻堅殺苻生而立十二月慕容
儁入屯鄴二年八月豫州刺史謝奕薨 二年閏三月

月犯歲星在房十月太白犯哭星占曰有大哭泣十二月填星犯軒轅大星占曰人主惡之甲午月犯東井

三年正月熒惑犯鍵閉星三月復逆行犯鈞鈴占俱曰人主惡之月犯太白在昴占曰人君死一曰趙地有兵胡不安六月太白犯東井七月熒惑犯天江丙戌太白犯輿鬼占悉同上戊子月犯牽牛中央大星占曰牽牛大將犯之將軍死八月太白犯軒轅大星甲子月犯畢大星占曰為邊兵一曰下犯上三年十月諸葛攸舟軍

入河敗績豫州刺史謝萬入朝衆潰而歸萬除名司徒
會稽王以二鎮敗求自貶三等四年正月慕容儁死子
暉代立慕容恪殺其尚書令陽鶩等 四年正月月犯

牽牛中央大星六月辰星犯軒轅占曰女主憂己未太
白入太微右掖門從端門出占曰貴奪勢一曰有兵又
曰出端門臣不臣八月太白犯氐占國有憂熒惑犯太
微西蕃上將星九月太白入南斗口犯第四星占曰為
喪有赦天下受爵祿十二月熒惑犯房月犯鍵閉占人

主惡之 五年正月乙丑月在危宿奄太白占曰天下靡散乙巳填星逆行犯太微三月月犯填星在軫占曰為大喪五月月犯太微又犯建星占曰大臣相謀時殷浩敗績坐廢其月辛亥月犯牽牛宿占曰國有憂六月癸亥月犯氐東北星占曰大將當之五年正月北中郎將郗曇薨五月帝崩哀帝立大赦賜爵褚后失勢七月慕容恪攻冀州刺史呂護於野王護奔滎陽是時桓溫以大衆次宛聞護敗乃退六月癸酉月奄氐東北星占

曰大將軍當之九月乙酉月奄畢占曰有邊兵十月丁未月犯畢大星占曰下犯上又曰有邊兵八月范汪廢隆和元年慕容暉遣將寇河陰

哀帝興寧三年七月月犯南斗占曰女主憂歲星犯輿鬼占曰人君憂明年庾后崩

海西公太和元年二月月奄熒惑在參占曰為內亂帝不終之徵一曰參魏地五年慕容暉亡二年正月太白入昴五年苻堅滅燕據幽冀司并四州六年閏月

熒惑守太微端門占曰天子亡國又曰諸侯三公謀其上
一曰有斬臣辛卯月犯心大星占曰王者惡之十一
月桓溫廢帝并奏誅武陵王簡文不許溫乃徙之新安
皆臣強之應也

簡文帝咸安元年十二月辛卯熒惑逆行入太微二年
三月猶不退占曰國不安有憂是時帝有桓溫之逼
二年五月丁未太白犯天關占曰兵起歲星形色如太
白占曰進退如度姦邪息變色亂行主無福歲星於仲

夏當細小而不明此其失常也又為臣強六月太白晝
見在七星乙酉太白犯輿鬼占曰國有憂七月帝崩桓
溫以兵威擅權將誅王坦之等內外迫脅又庾希入京
城盧悚入宮並誅滅之

孝武寧康元年正月戊申月奄心大星按占曰災不在
王者則在豫州一曰王命惡之三月景午月奄南斗第
五星占曰大臣有憂死亡一曰將軍死七月桓溫薨九
月癸巳熒惑入太微是時女主臨朝政事多缺二年

閏月己未月奄牽牛南星占曰左將軍死十二月甲申
太白晝見在氐氐兖州分野三年五月景午北中郎將
王坦之薨 三年六月癸卯太白犯東井占曰秦地有
兵九月戊申熒惑奄左執法占曰執法者死太元元年
苻堅破涼州二年十月尚書令王彪之卒 太元元年
四月景戌熒惑犯南斗第三星景申又奄第四星占曰
兵大起中國饑一曰有赦八月癸酉太白晝見在氐氐
兖州分野九月熒惑犯哭泣星遂入羽林占曰天子有

哭泣事中軍兵起十一月己未月奄氏角占曰天下有
兵一曰國有憂 二年二月熒惑守羽林占曰禁兵大
起九月壬子太白晝見在角角兗州分野升平元年五
月大赦三年八月秦人寇樊鄧襄陽彭城四年二月襄
陽陷朱序沒四月魏興陷賊聚廣陵三河衆五六萬於
是諸軍外次衝要丹陽尹屯衛京師六月兗州刺史謝
元討賊大破之是時中外連兵比年荒儉 四年十一
月丁巳太白犯哭星占曰天子有哭泣事 五年七月

景子辰星犯軒轅占曰女主當之九月癸未皇后王氏崩十二年二月熒惑入月占曰有亂臣死若有相戮者一曰女親為政天下亂時瑯琊王輔政王妃從兄王國寶以姻昵受寵袁悅等交構主相扇揚朋黨帝殺悅自是主相有隙亂階興十三年十一月辰星八月在危占曰賊臣欲殺主不出三年必有內惡十二月熒惑在角亢形色猛盛占曰熒惑失其常吏且棄其法諸侯亂政自是慕容垂翟遼姚萇苻登慕容永並阻兵爭強

十四年十二月月犯歲星熒惑入羽林占並同上十五年翟遼據司寇衆軍累討弗克慕容氏又跨略并冀七月旱八月諸郡大水兗州又蝗十五年九月熒惑入太微十月太白入羽林十六年十一月癸巳月奄心前星占曰太子憂時太子常有篤疾十八年正月熒惑入月占曰憂在宮中非賊乃盜也一曰有亂臣若有戮者二十一年九月帝暴崩衆言張夫人弑逆又王國寶邪狡卒伏其辜十九年四月月奄歲星在尾占

曰為饑燕國亡二十年慕容垂伐魏反為所破死者數萬人垂死國遂衰亡 二十年六月熒惑入天囷占曰大饑十二月己巳月犯鍵閉及東西咸占曰鍵閉司心腹喉舌東西咸主陰謀 二十一年四月壬午太白入天囷占曰為饑六月歲星犯哭泣星占曰有哭泣事是年帝崩隆安元年王恭等舉兵脅朝廷於是內外戒嚴殺王國寶以謝之又連歲水旱三方動衆人饑

安帝隆安元年正月熒惑犯哭泣星占曰有哭泣事六

月月奄太白在太微端門外占曰國受兵乙酉月奄歲星在東壁占曰為饑衛地有兵二年六月郤恢遣鄧啟方以萬人伐慕容於滑臺啟方敗三年桓玄等並舉兵內外戒嚴三年五月月奄東上相辰星犯軒轅大星占悉同上其年庾楷等舉兵表誅王愉等內外戒嚴三年洛陽沒於寇桓元破荆雍州殺殷仲堪等孫恩聚眾攻沒會稽殺內史四年正月乙亥月犯填星在牽牛占曰吳越有兵喪女主憂六月月犯哭星又犯填星十

月月奄歲星在北河占為饑胡有兵其四年五月孫恩亂七月太皇太后李氏崩七月癸亥大角星散搖五色占曰王者流散丁卯月犯天關占王者憂九月熒惑犯少微又守之占曰處士誅十月月犯東次相其次年盧循桓元內外遘逆元興元年四月月奄辰星七月大饑人相食熒惑在東井犯輿鬼積尸八月太白犯右執法九月太白犯進賢占曰進賢者誅二年二月歲星犯西上將六月月奄斗第四星占曰大臣誅不出十一

月十二月月犯熒惑是月桓元篡位 三年正月熒惑逆行犯太微西上相占曰天子戰於野上相死月奄歲星於左角占曰天下兵起二月熒惑逆行在左執法西北占曰執法者誅四月月奄軒轅第二星五月月奄斗第二星填星入羽林是年春劉裕討桓元元劫天子如江陵五月義軍破滅之 義熙元年三月月奄左執法及心前星占曰豫州有災太白犯東井占曰秦有兵四月月犯填星在東壁占曰其地亡國貴人死一曰人流

八月太白犯斗第一星占曰天下有兵一曰大人憂九月熒惑犯少微占曰處士誅又犯左右執法十月奄填星在營室十一月景戌太白犯鉤鈴占曰喉舌憂十二月己卯歲星犯天關占曰有兵亂河津不通十一月荊州刺史魏詠之薨二年二月司馬國璠等攻沒弋陽四月姚興伐仇池公楊盛擊走之九月益州刺史司馬榮期為其參軍楊承祖所害三年十二月司徒揚州刺史王謚薨四年正月太保武陵王遵薨三月左僕射孔安

國卒自後政在劉裕人主端拱而已 二年二月太白

犯南河占曰兵起己丑月犯心後星占曰豫州有災四月癸丑月犯太微西上將己未月犯房南第二星乙丑歲星犯天江占曰有兵亂河津不通五月癸未月犯左角占曰左將軍死天下有兵壬寅熒惑犯氐占曰氐為宿宮人主憂六月庚午熒惑犯房北第二星八月癸亥熒惑犯南斗第五星丁巳犯建星占曰為兵九月壬午熒惑犯哭星又犯泣星是年二月甲戌司馬國璠等攻

沒弋陽又慕容超侵畧徐兗三年正月又寇北徐州至
下邳十二月司徒王謚薨四年正月武陵王遵薨五年
慕容超復寇淮北四月劉裕大軍討之拔臨朐又圍廣
固十二月月奄太白在危占曰齊亡國五年劉裕滅燕
三年月奄心後星又犯左角八月太白犯左執法熒
惑復犯之九月熒惑犯進賢 四年正月熒惑犯天關
五月月奄斗第二星填星犯天廩占曰天下饑倉粟少
六月太白犯太微西上將又犯左執法十月熒惑入羽

林 五年二月月犯昴占曰胡不安天子破匈奴五月
戊戌歲星入羽林九月犯昴十月熒惑犯氐又犯鈎鈴
己巳奄心大星占曰王者惡之是年劉裕討慕容超十
月魏王珪遇弒殂次年盧循逼郊甸 六年三月丁卯
月奄房南第二星災在次相己巳又奄斗第五星占斗
上吳地兵起太白犯五諸侯占曰諸侯有誅五月甲子
月奄斗第五星己亥月奄昴三星占曰國有憂一曰有
白衣之會六月己丑月犯房南第二星甲午太白晝見

七月己亥月犯輿鬼占曰國有憂一曰秦有兵八月壬午太白犯軒轅大星甲申月犯心前星災在豫州景戌月犯斗第五星占同上丁丑月奄牛宿南星占曰天下有大誅乙未太白犯少微景午太白在少微而晝見九月甲寅太白犯左執法丁丑填星犯畢占曰有邊兵是年徐道覆盧循反衆逼郊畿七年十二月破斬之八年豫州刺史劉道規卒七年四月熒惑入輿鬼占曰秦有兵一曰雍州災六月填星犯天關占曰臣謀主月犯

歲星在畢占曰有邊兵且饑八月太白犯房南第二星
月犯歲星在參占曰益州兵饑七月朱齡石克蜀蜀又
反討滅之十一月太白犯哭星八年正月月犯歲星
在畢七月癸亥月奄房北第二星己未月犯井鉞八月
戊申月犯泣星十月辛亥月奄天關占曰有兵十一月
丁丑填星犯東井占曰大人憂十二月癸卯填星犯井
鉞是年八月皇后王氏崩九月誅劉蕃謝混討滅劉毅
十二月朱齡石滅蜀九年二月熒惑入輿鬼占曰有

兵喪太白犯南河占曰兵起五月壬辰太白犯右執法
晝見七月庚午月奄鉤鈴占曰喉舌臣憂九月庚午歲
星犯軒轅大星己丑月犯左角時劉裕擅命兵革不休
十年裕討司馬休之王師不利休之等奔長安 十年
正月丁卯月犯畢占曰將相有以家坐罪者二月己酉
月犯房北星五月壬寅月犯牽牛南星乙丑歲星犯軒
轅大星占悉同上六月景申月奄氐占曰將死之國有
誅者七月庚辰月犯天關占曰兵起熒惑犯井鉞填星

犯輿鬼遂守之占曰大人憂宗廟改八月丁酉月奄牽
牛南星占同上九月填星犯輿鬼占曰人主憂丁巳太白
入羽林十二月己酉月犯西咸占曰有陰謀十一年林
邑寇交州距敗之 十一年三月丁巳月入畢占曰天
下兵起一曰有邊兵己卯熒惑入輿鬼閏月景午填星
又入輿鬼占曰為旱大疫為亂臣五月癸卯熒惑入太
微甲辰犯右執法六月己未太白犯東井占曰秦有兵
戊寅犯輿鬼占曰國有憂七月辛丑月犯畢占同上八

月壬子月犯氐占同上庚申太白順行從右掖門入太
微丁卯奄左執法十一月癸亥月入畢占同上乙未月
入輿鬼而暈十二年五月月犯歲星在左角占曰為
饑歲星留房心之間宋之分野始封劉裕為宋公六月
壬子太白順行入太微右掖門己巳月犯畢占同上七
月月犯牛宿十月景戌月入畢十三年五月景子月
犯軒轅丁亥犯牽牛癸巳熒惑犯右執法八月己酉犯
牽牛丁卯月犯太微占曰人君憂九月壬辰熒惑犯軒

轅十月戊申月犯畢占悉同上月犯箕占曰國有憂甲寅
月犯畢占同上乙卯填星犯太微留積七十餘日占曰
亡君之戒壬戌月犯太微十四年三月癸巳太白犯
五諸侯四月壬申月犯填星於張占曰天下有大喪其
明年帝崩五月庚子月犯太微七月甲辰熒惑犯輿鬼
占曰秦有兵又為旱為兵喪亦曰大人憂宗廟改亦為
亂臣時劉裕擅命軍旅數興饑旱相屬其後卒移晉室
丁巳月犯東井占曰軍將死八月甲子太白犯軒轅癸

酉填星入太微犯右執法因留太微中積二百餘日乃去占曰填星守太微亡君之戒有徙王九月乙未太白入太微犯左執法丁巳入太微占曰大人憂十月甲申月入太微癸巳熒惑入太微犯西蕃上將仍順行至左掖門內留二十日乃逆行義熙十二年七月劉裕伐姚泓十三年八月擒姚泓司兗秦雍悉平十四年劉裕還彭城受宋公十一月左僕射前將軍劉穆之卒明年西虜寇長安雍州刺史朱齡石諸軍陷沒官軍捨而東

恭帝元熙元年正月三月五月月皆犯太微辰星犯軒
轅六月太白犯太微七月月犯歲星太白犯哭星十二
月月入太白俱入羽林 二年三月填星犯太微元年
七月劉裕受宋王是年六月帝遜位於宋

宋孝武孝建二年五月乙未熒惑入南斗

齊東昏侯永元三年十一月甲寅辰星及太白俱見南
方是日荊州長史蕭穎胄奉南康王寶融起兵後即帝
位是為和帝

梁武帝天監元年八月壬寅熒惑守南斗占曰糴貴五穀不成大旱多火災宰相死是歲大旱米斗五十人多餓死五月尚書范雲卒二年五月丙辰月犯心占曰有亂臣其四年交州刺史李凱舉兵反七月景子太白犯軒轅大星七年九月己亥月犯東井占曰有水災其年京師大水十三年二月太白失行在天關占曰津梁不通又兵起其年填星守天江占曰有江河塞有決溢有土功其年大發軍衆造浮山碣淮水至十四年

填星去天江而堰壞奔流決溢 十四年十月辛未太白犯南斗 十七年閏八月戊辰月行奄昴 普通六年三月丙午歲星入南斗九月壬子太白犯右執法大通元年八月月奄填星占曰有大喪天下無主國易政其後上幸同泰寺捨身王公以錢奉贖又太子薨皆無主易政大喪之應 中大通元年閏月壬戌熒惑犯鬼積尸星占曰有大喪大兵破軍殺將其二年蕭玩帥衆援巴州為魏所敗玩被殺 六年熒惑在南斗占曰

熒惑出入留舍南斗中有賊臣謀反天下易政改元其
年十二月北梁州刺史蘭欽舉兵反後改大同元年

大同三年三月歲星奄建星占曰有反臣其年會稽山
賊起七年交州刺史李賁反太清三年正月熒惑守
心占曰王者惡之三月熒惑又守心占曰大人易政主
去其宮人饑亡天下大潰其年帝為侯景所逼崩七月
九江大饑人相食九月月在斗奄歲星占曰天下亡君
其後侯景篡殺

元帝承聖三年九月甲午月犯心中星占曰有反臣王者惡之有亡國其後三年帝為周師所俘梁亡陳氏取國

陳武帝永定三年九月月入南斗占曰大人憂太子殃後二年帝崩太子昌在周為質文帝立後昌還國為侯安都迎殺之

文帝天嘉元年五月熒惑犯右執法占曰大臣有憂執法者誅後四年司空侯安都賜死二年五月己酉歲

星守南斗六月丙戌熒惑犯東井七月乙丑熒惑入鬼
中戊辰熒惑犯斧質十月熒惑行在太微右掖門 三
年閏二月己丑熒惑逆行犯上相甲子太白犯五車填
星七月太白犯輿鬼八月癸卯月犯南斗景午月犯牽
牛庚申太白入太微十一月丁丑月犯畢左股辛巳熒
惑犯歲星戊子月犯角庚寅月入氐 四年六月癸丑
太白犯右執法七月戊子熒惑犯填星八月甲午熒惑
犯軒轅大星丁未太白犯房九月戊寅熒惑入太微犯

右執法癸未太白入南斗占曰太白入斗天下大亂將
相謀反國易政又曰君死不死則廢又曰天下受爵祿
其後安成王為太傅廢少帝而自立改官受爵之應也
辛卯熒惑犯左執法十一月辛酉熒惑犯執法甲戌月
犯畢左股 五年正月甲子月犯畢大星丁卯月犯星
壬寅月入氐又犯熒惑癸卯月犯房上星五月熒惑逆
行二十一日犯氐東南西南星占曰國有賊臣又曰人
主無出廊廟間有伏兵又曰君死有赦後二年少帝廢

之應也六月景申月犯亢七月戊寅月犯畢大星閏十月庚申月犯牽牛丙子又犯左執法十一月月食畢大星六年四月月犯畢軒轅占曰女主有憂五月太白犯軒轅占同其後少帝廢廢後慈訓太后崩六月己未月犯氐八月戊辰月奄畢大星景子月與太白並光芒相著在太微西藩南三尺所九月辛巳熒惑犯左執法癸未太白犯右執法辛卯犯左執法己巳月犯上相廢帝天康元年五月月犯軒轅女御大星占曰女主憂

後年太后崩癸未月犯左執法 光大元年正月月犯
軒轅大星占曰女主當之八月月食哭星占曰有喪泣
事明年太后崩臨海王廢己未月犯歲星占曰國亡君
十二月辛巳月又犯歲星辛卯月犯建星占曰大人惡
之 二年正月月奄歲星占曰國亡君五月月犯太白
六月太白犯左執法八月犯太微十一月丙午歲星守
左執法甲申月犯太微東南星戊子太白入氐其年帝
廢

宣帝太建七年五月熒惑犯右執法十年十月月食熒惑占曰國敗君亡大兵起破軍殺將來年吳明徹敗於呂梁十三年帝崩十二年十月戊午月犯牽牛吳越之野占曰其國君有憂後年帝崩

齊文宣帝天保元年十二月熒惑犯房北頭第一星及鈎鈴占曰大臣有反者二年太尉彭樂謀反誅八年二月歲星守少微經六十三日占曰五官亂五月歲星犯太微上將占曰大將憂大臣死其十年誅諸元宗室

四十餘家乾明元年誅楊彥遵等皆五官亂大臣死之
應七月月奄心星占曰人主惡之 九年二月熒惑犯
鬼質占曰斧質用有大喪三月熒惑犯軒轅其十年五
月誅諸元十月帝崩斧質用大喪之應也

廢帝乾明元年三月熒惑入軒轅占曰女主凶太寧二
年太后崩

肅宗皇建二年七月熒惑入鬼中犯鬼質占曰有大喪
十一月帝暴崩

武成帝河清元年七月太白犯輿鬼占曰有兵謀誅大臣
斧質用十月冀州刺史平秦王高歸彥反討誅之又
二年殺太原王紹德皆斧質之應八月月奄畢占曰國
君死大臣誅有邊兵破軍殺將其月歸彥以反誅三年
周師與突厥入并州大戰城西伏尸流血百餘里皆其
應也

後主天統五年二月歲星逆行奄太微上將占曰天下
大驚四輔有誅者五月甲午熒惑犯鬼積尸占曰大臣

誅兵大起斧質用有大喪至武平二年九月誅琅邪王儼三年誅右丞相斛律明月四年誅蘭陵王長恭皆懿親名將四年誅崔季舒等皆斧質用之應 四年五月熒惑犯右執法占曰大將軍死執法者誅其應如前周閔帝元年五月癸卯太白犯軒轅占曰大臣出令又曰皇后失勢辛亥熒惑犯東井北端第二星占曰其國亂又曰大旱其年九月冢宰護廢帝幽而弑之又殺司會李植等其冬大旱皆大臣出令大臣死旱之應也

明帝二年三月熒惑入軒轅占曰王惡之女主凶其月獨狐后崩六月庚子填星犯井鉞與太白并占曰傷成於鉞君有戮死者其年太師護毒帝崩

武帝保定二年閏正月太白入昴二月壬寅熒惑犯太微上相三月壬午熒惑犯左執法七月太白犯輿鬼

三年九月熒惑犯太微上將十月熒惑犯左執法四年三月熒惑犯房右驂占曰上相誅車馳人走天下兵起其年十月伐齊柱國庸公王雄力戰死之遂班師兵

起將死之應也 天和元年七月太白犯軒轅大星相
去七寸占曰女主失勢大臣當之又曰西方禍起其十
一月太保許公宇文貴薨十月熒惑犯鈎鈴去之六寸
占曰王者憂又曰車騎驚三公謀 三年三月太白犯
井北轅第一星占曰將軍惡之其七月隋公楊忠薨四
月太白入輿鬼犯積尸占曰大臣誅又曰亂臣在內有
屠城 四年二月歲星逆行奄太微上將占曰天下大
驚國不安四輔有誅必有兵革天下大赦五月熒惑犯

輿鬼及積尸占曰大臣有誅後三年太師宇文護以不臣誅 六年四月熒惑逆行犯輿鬼占曰有兵喪大臣誅兵大起其月取齊宜陽等九城六月齊將攻陷汾州建德元年九月月犯心中星相去一寸占曰亂臣在旁不出五年下有亡國後伐齊平之 二年二月熒惑奄鬼西北星占曰大賊在大人之側又曰大臣有誅四月太白奄西北星又奄東北星占曰國有憂六月月犯心中後二星占曰不出三年有亡國人主惡之九月太

白犯左執法占曰大臣憂執政誅 三年十二月月犯
歲星在危相去二寸占曰其邦流亡不出三年辛卯月
行在營室食太白占其國以兵亡營室衛在齊地後齊
亡 四年三月月犯軒轅大星占曰女主有憂又五官
有亂 五年十月熒惑犯太微西蕃上將星占曰天下
不安上將誅六年皇太子西巡討吐谷渾吐谷渾寇邊
天下不安之應六月熒惑入鬼占曰有喪旱十月歲星
犯大陵 六年四月先時熒惑入太微宮二百日犯東

蕃上相西蕃上將句已往還至此月甲子出端門占曰
為大臣代主又曰臣不臣有反者又曰大喪後宣武繼
崩高祖以大運代起十月月食熒惑在斗占曰國敗君
亡兵大起斗為吳越陳之分野宣政元年七月月犯
心前星占曰太子惡之若失位後靜帝立為天子不終
之徵己未太白犯軒轅大星占女主凶後二年宣帝崩
隋氏受命廢楊后為平樂公主餘四后悉廢為比丘尼
八月庚辰太白入太微占曰為天下驚又曰近臣起兵

大臣相殺國有憂其後趙陳等五王為執政所誅大臣相殺之應也九月丁酉熒惑入太微西掖門庚申犯左執法相去三寸占曰天下不安大臣有憂又曰執法者誅若有罪是月汾州稽胡反討平之十一月突厥寇邊圍酒泉殺略吏人明年二月殺柱國郟公王軌皆其應也十二月癸未熒惑入氐守犯之三十日占曰天子失其宮又曰賊臣在內下有反者又曰國君有繫饑死若毒死者靜帝禪位隋高祖幽殺之

宣帝大象元年七月壬辰熒惑奄房北頭第一星占曰
亡君之誠又曰將軍為亂王者惡之大臣有反者天子
憂其十二月帝親御驛馬日行三百里四皇后及文武
侍衛數百人並乘驛以從房為天駟熒惑主亂此宣帝
亂道德馳騁車騎將亡之誠八月辛巳熒惑犯南斗第
五星占曰且有反臣道路不通破軍殺將尉遲迴王謙
等起兵敗亡之徵也九月己酉太白入南斗魁中占曰
天下有大亂將相謀反國易政又曰君死不死則疾又

曰天下爵祿皆高祖受命羣臣分爵之徵也十月壬戌
歲星犯軒轅大星占曰女主憂若失勢

靜帝大定元年正月歲星逆行守右執法熒惑奄房北
第一星占曰房為明堂布政之宮無德者失之二月隋
王稱帝

隋高祖開皇八年二月填星入東井占曰填星所居有
德利以稱兵其年大舉伐陳克之

煬帝大業元年六月熒惑入太微占曰熒惑為賊為亂

入宮宮中不安 三年三月熒惑逆行入南斗色赤如血如三斗器光芒震耀長七八尺於斗中句已而行占曰有反臣道路不通國大亂兵大起其後楊元感反雖誅滅而羣盜屯聚剽掠州縣道路不通斗牛楚越分野元感父初封越後徙封楚 九年五月丁丑熒惑入南斗 十一年熒惑守羽林占曰衛兵反 十三年六月鎮星羸而旅於參參唐星也李淳風曰鎮星主福未當居而居所宿國吉七月熒惑守積尸十一月熒惑犯太

微

恭宗義寧二年三月丙午熒惑入東井占曰大臣憂

文獻通考卷二百八十八

欽定四庫全書

文獻通考卷二百八十九

鄱陽馬端臨貴與著

象緯考十二

月五星凌犯

唐高祖武德元年六月丙子癸惑犯右執法占曰執法大臣象二年七月戊寅月犯牽牛凡月與列宿相犯其宿地憂牽牛吳越分九月庚寅太白晝見冬癸惑守

五諸侯 六年七月癸卯熒惑犯輿鬼西南星占曰大臣有誅 七年六月熒惑犯右執法七月戊寅歲星犯畢占曰邊有兵 八年九月癸丑熒惑入太微太微天廷也冬太白入南斗斗主爵祿 九年五月太白晝見六月丁巳經天巳未又經天在秦分丙寅月犯氐氐為天子宿宮巳卯太白晝見七月辛亥晝見甲寅晝見八月丁巳晝見太白金經天者陰乘陽也

太宗貞觀三年三月丁丑歲星逆行入氐占曰人君治

宮室過度一曰饑 五年五月庚申鎮星犯鍵閉占為
腹心喉舌臣 九年四月丙午熒惑犯軒轅 十年四
月癸酉復犯之占曰熒惑主禮禮失而後罰出焉軒轅
為後宮 十一年二月癸未熒惑入輿鬼占曰賊在大
人側 十二年六月辛卯熒惑入東井占曰旱 十三
年五月乙巳犯右執法六月太白犯東井北轅井京師
分也 十四年十一月壬午月入太微占曰君不安
十五年二月熒惑逆行犯太微東上相 十六年五月

太白犯畢左股畢為邊將六月戊戌晝見九月己未熒惑
犯太微西上將十月丙戌入太微犯左執法 十七年
火犯鍵閉三月丁巳守心前星癸酉逆行犯鈎鈐熒惑
常以十月入太微受制而出伺其所守犯天子所誅也
鍵閉為心腹喉舌臣鈎鈐以開闔天心皆貴臣象 十
八年十一月乙未月掩鈎鈐 十九年七月壬午太白
入太微是夜月掩南斗太白遂犯左執法光芒相及箕
斗間漢津高麗地也太白為兵亦罰星也 二十年七

月丁未歲星守東壁占曰五穀以水傷 二十一年四月戊寅月犯熒惑占曰貴臣死十二月丁丑月食昴占曰天子破匈奴 二十三年五月丁亥犯右執法七月太白晝見乙巳鎮星守東井占曰旱閏十二月辛巳太白犯建星占曰大臣相譖

高宗永徽元年二月己丑熒惑犯東井占曰旱四月己巳月犯五諸侯熒惑犯輿鬼占曰諸侯凶五月己未太白晝見 二年六月己丑太白入太微犯右執法九月

甲午犯心前星十二月乙未太白晝見 三年正月壬戌犯牽牛牽牛為將軍又吳越分也丁亥歲星掩太微上將二月己丑熒惑犯五諸侯五月戊子掩右執法

四年六月己丑太白晝見 六年七月乙亥歲星守尾占曰人主以嬪為后己丑熒惑入輿鬼八月丁卯入軒轅顯慶元年四月丁酉太白犯東井北轅占曰秦有兵 五年二月甲午熒惑入南斗六月戊申復犯之南斗天廟去復來者其事大且久也 龍朔元年六月辛

已太白晝見經天九月癸卯犯左執法 二年七月已
丑熒惑守羽林羽林禁兵也 三年正月己卯犯天街
占曰政塞姦出六月乙酉太白入東井占曰君失政大
臣有誅 麟德二年三月戊午熒惑犯東井四月壬寅
入輿鬼犯質星 乾封元年八月乙巳熒惑入東井
二年五月庚申入軒轅 三年正月乙巳月犯軒轅大
星 咸亨元年四月癸卯月犯東井占曰人主憂七月
壬申熒惑入東井占曰旱丙申月犯熒惑占曰貴人死

十二月丙子熒惑入太微 二年四月戊辰復犯太微
垣將相位也 五年六月壬寅太白入東井 上元二
年正月甲寅熒惑犯房占曰君有憂一曰有喪 三年
正月丁卯太白犯牽牛占曰將軍凶 儀鳳二年八月
辛亥太白犯軒轅左角左角貴相也 三年七月戊寅
熒惑犯鈞鈴 四年四月戊午入羽林占曰軍憂 調
露元年七月辛巳入天囷 永隆元年五月癸未犯輿
鬼丁酉太白晝見經天是謂陰乘陽陽君道也 永淳

元年五月丁巳辰星犯軒轅九月庚戌熒惑入輿鬼犯質星十一月乙未復犯輿鬼去而復來是謂勾已

武后垂拱元年四月癸未辰星犯東井北轅辰星為廷尉東井為法令失道則相犯也十二月戊子月掩軒轅大星二年三月丙辰復犯之萬歲通天元年十一月乙丑歲星犯司怪占曰水旱不時聖歷元年五月

庚午太白犯天關天關主邊事二年熒惑入輿鬼

三年三月辛亥歲星犯左執法久視元年十二月甲

成晦熒惑犯軒轅自乾封二年後月及熒惑太白辰星凌
犯軒轅者六 長安二年熒惑犯五諸侯渾儀監尚獻
甫奏臣命在金五諸侯太史之位火克金臣將死矣武
后曰朕為卿禳之以獻甫為水衡都尉水生金又去太
史之位卿無憂矣是秋獻甫卒 四年熒惑入月鎮星
犯天關

中宗神龍元年三月癸巳熒惑犯天田占曰旱七月辛
巳掩氐西南星占賊臣在內 二年閏正月丁卯月掩

軒轅后星九月壬子熒惑犯左執法己巳月犯軒轅后
星十一月辛亥犯昴占曰胡王死戊午熒惑入氐十二
月丁酉犯天江占曰旱三年五月戊戌太白入輿鬼
中占曰大臣有誅景龍三年六月癸巳太白晝見在
東井京師分也四年二月癸未熒惑犯天街五月甲
子月犯五諸侯

睿宗景雲二年三月壬申太白入羽林八月己未歲星
犯執法三月壬申熒惑入東井

元宗先天元年八月甲子太白襲月占曰太白兵象月
大臣體 二年十一月丙子熒惑犯司怪 開元二年
七月己丑太白犯輿鬼東南星 七年六月甲戌太白
犯東井鉞星占曰斧鉞用 八年三月庚午犯東井北
轅五月甲子犯軒轅 十一年十一月丁卯歲星犯進
賢 十四年十月甲寅太白晝見 二十五年六月壬
戌熒惑犯房 二十七年七月辛丑犯南斗占曰貴相
凶 天寶十三載五月熒惑守心五旬餘占曰主去其

宮 十四載十二月月食歲星在東井占曰其國亡東井京師分也

肅宗至德二載七月己酉太白晝見經天至於十一月戊午不見歷秦周楚鄭宋燕之分十二月歲星犯軒轅大星占曰女主謀君 乾元元年五月癸未月掩心前星占曰太子憂六月癸丑入南斗魁中占曰大人憂

二年正月癸未歲星食月在翼楚分也一曰饑二月丙辰月犯心中星占曰主命惡之上元元年五月癸丑

月掩昴占曰胡王死八月己酉太白犯進賢十二月癸未歲星掩房占曰將相憂三年建子月癸巳月掩昴出昴北八月丁卯又掩昴

代宗廣德元年四月己丑月掩歲星占曰饑永泰元年九月辛卯太白晝見經天大歷二年七月癸亥熒惑入氐其色赤黃乙丑鎮星犯水位占曰有水災乙亥歲星犯司怪八月壬午月入氐丙申犯畢九月戊申歲星守東井占皆為有兵乙丑熒惑犯南斗在燕分十二

月丁丑犯壘壁占曰兵起 三年正月壬子月掩畢八

月己未復掩畢辛酉入東井九月壬申歲星入輿鬼主
死喪丁丑熒惑入太微二旬而出己卯太白犯左執法

四年二月壬寅熒惑守房上相丙午有芒角三月壬
午逆行入氐中是月鎮星犯輿鬼七月戊辰熒惑犯次
相九月丁卯犯建星占曰大臣相譖 五年二月乙巳

歲星入軒轅六月丁酉月犯進賢庚子犯氐庚戌太白
入東井 六年七月乙巳月掩畢入畢中壬子月犯太

微八月甲戌熒惑犯鎮星庚辰月入太微九月壬辰熒惑犯哭星庚子犯泣星是夜月掩畢丁未入太微十月丁卯掩畢己巳熒惑犯壘壁甲戌月入軒轅占曰憂在後宮十一月壬寅入太微丙午掩氐十二月己巳入太微七年正月乙未犯軒轅二月戊午掩天關占曰亂臣更天子法令己巳熒惑犯天街四月丁巳入東井辛未歲星犯左角占曰天下之道不通壬申月入羽林五月丙戌入太微八年四月癸丑歲星掩房占曰將相

憂又宋分也甲寅熒惑入壘壁五月庚辰入羽林七月
己卯太白入東井留七日非常度也占曰秦有兵乙未
月入畢中癸未入羽林己丑太白入太微占曰兵入天
廷八月晝見十一月丁巳月掩畢壬戌入輿鬼掩質星
庚午月及太白入氐中占曰君有哭泣事十一月己卯
月入羽林癸未太白入房占曰白衣會不曰犯而曰入
蓋鈎鉤間癸丑月掩天關甲寅入東井癸酉入羽林
九年三月丁未熒惑入東井四月丁丑月入太微五月

己未太白入軒轅占曰憂在後宮六月己卯月掩南斗
庚辰入太微七月甲辰掩房辛亥入羽林壬戌入輿鬼
九月辛丑太白入南斗占曰有反臣又曰有赦甲子熒
惑入氐宋分也十月戊子歲星入南斗占曰大臣有誅
十二月戊辰月入羽林 十年三月庚戌熒惑入壘壁
四月甲子入羽林八月戊辰月入太微 十一年閏八
月丁酉太白晝見經天 十二年正月乙丑月掩軒轅
癸酉掩心前星宋分也丙子入南斗魁中二月乙未鎮

星入氐中占曰其分兵喪李正己地也三月壬戌月入
太微四月乙未掩心前星五月丙辰入太微戊戌入羽
林七月庚戌入南斗乙亥熒惑入東井十月壬辰月掩
昂庚子入太微十一月乙卯入羽林十二月壬午復入
羽林自六年至此月入太微者十有二入羽林者八熒
惑入東井再入羽林三入壘壁月太白歲星犯皆南斗
魁中 十四年春歲星入東井

德宗建中元年十一月月食歲星在秦分占曰其國亡

是月歲星食天尸天尸輿鬼中星占曰有妖言小人在
位君王失樞死者大半 三年七月月掩心中星 貞
元四年五月丁卯月犯歲星在營室六月癸卯熒惑逆
行入羽林占曰君有憂 六年五月戊辰月犯太白間
容一指占曰大將死 十年四月太白晝見 十一年
七月熒惑太白相繼犯太微上將 十三年二月戊辰
太白入昴三月庚寅月犯太白 十九年三月熒惑入
南斗色如血斗吳越分色如血者旱妖也 二十一年

正月己酉太白犯昴趙分也

順宗永貞元年十二月丙午月犯畢己酉歲星犯太微
西垣將相位也

憲宗元和元年十月太白入南斗十二月復犯之斗吳
分也 二年正月癸丑月犯太白于女虛二月壬申月
掩歲星占曰大臣死四月丙子太白犯東井北轅己卯
月犯房上相 三年三月乙未鎮星食月在氐占曰其
地主死 四年九月癸亥太白犯南斗 七年正月辛

未月掩熒惑五月癸亥熒惑犯右執法六月己亥月犯
南斗魁 八年七月癸酉月犯五諸侯十月己丑熒惑
犯太微西上將十二月掩左執法 九年二月丁酉月
犯心中星七月辛亥掩心中星占曰其宿地凶心豫州
分壬辰月掩軒轅是月太白入南斗至十月出乃晝見
熒惑入南斗中因留犯之南斗天廟又丞相位也 十
年八月丙午月入南斗魁中 十一年二月丙辰月掩
心是月熒惑入氐因逆行三月己丑月犯鎮星在女齊

分也四月丙辰太白犯輿鬼占曰有僂臣六月甲辰月掩心後星是月熒惑復入氐是謂勾已十一月戊寅月犯歲星十二月甲午犯鎮星在危亦齊分也 十二年

三月丁丑月犯心 十三年正月乙未歲星逆行犯太微西上將三月熒惑入南斗因逆留至於七月在南斗中大如五升器色赤而怒乃東行非常也八月甲戌太白犯左執法乙巳熒惑犯哭星十月甲子月犯昴趙分也 十四年正月癸卯月犯南斗魁占曰相凶五月丙

戌月犯心中星七月乙酉掩心中星十五年正月丙申復犯中星四月太白犯昴七月庚申熒惑逆行入羽林八月己卯月掩牽牛吳越分也十一月壬子月犯東井西轅

穆宗長慶元年正月丙午月掩東井鉞遂犯南轅第一星二月乙亥太白犯昴趙分也丁亥月犯歲星在尾占曰大臣死燕分也三月庚戌太白犯五車因晝見至於七月以歷度推之在唐及趙魏之分占曰兵起七月壬

寅月掩房次相九月乙巳太白犯左執法 二年九月
太白晝見熒惑守天囷六旬餘乃去占曰天囷上帝之
藏耗祥也十月熒惑犯鎮星於昴甲子月掩牽牛中星
占曰吳越凶十一月丁丑掩左角十二月復掩之占曰
將死甲寅月犯太白於南斗 四年三月庚午太白犯
東井北轅遂入井中晝見經天七日而出因犯輿鬼京
師分也五月乙亥月掩畢大星六月丙戌鎮星依歷在
觜觿羸行至參六度當居不居失行而前遂犯井鉞占

曰所居宿久國福厚易福薄又曰羸為王不寧鉞主斬刈而又犯之其占重癸未熒惑犯東井丁亥入井中己丑太白犯軒轅右角因晝見至於九月占曰相凶十月辛巳月入畢口十一月熒惑逆行向參鎮星守天關十二月戊子月掩東井

敬宗寶歷元年四月壬寅熒惑入輿鬼掩積尸七月癸卯犯執法甲辰鎮星犯東井甲子月掩畢大星癸未太白犯南斗丙戌月犯畢十月辛亥犯天囷十一月庚辰

鎮星復犯東井癸未月犯東井 二年正月甲申犯左
執法戌子入於氐三月丙午犯畢五月甲午熒惑犯昴
六月太白犯昴七月壬申月犯畢八月庚戌熒惑犯輿
鬼

文宗太和元年正月庚午月掩畢三月癸丑入畢掩大
星月變於畢者自寶歷元年九月及茲而五五月月掩
熒惑在太微西垣丙戌熒惑犯執法 二年正月庚午
月掩鎮星七月甲辰熒惑掩輿鬼質星十月丁卯月掩

東井北轅 三年二月乙卯太白犯昴壬申熒惑掩右
執法七月入於氐十月入於南斗 四年四月庚申月
掩南斗杓次星十一月辛未熒惑犯右執法 五年二
月甲申月掩熒惑三月熒惑犯南斗杓次星 六年四
月辛未月掩鎮星於端門己丑太白晝見七月戊戌月
掩心大星辛丑月掩南斗杓次星 七年五月甲辰熒
惑守心中星六月丙子月掩心中星遂犯熒惑七月甲
午月掩心中星丙申掩南斗口第二星九月丁巳入於

箕戌辰入於南斗癸酉太白入南斗冬鎮星守角次年
二月始去 八年七月戊子月犯昴十月庚子熒惑鎮
星合於亢十二月丙戌月掩昴是歲月入南斗者五占
曰大人憂 九年夏太白晝見自軒轅至翼軫六月庚
寅月掩歲星在危而暈十月庚辰月復掩歲星在危
開成元年正月甲辰太白掩建星占曰大臣相譖六月
丁未月掩心前星八月乙巳入南斗 二年正月壬申
月掩昴二月己亥月掩太白於昴中六月甲寅月掩昴

而暈太白亦有暈六月己酉大星晝見庚申太白入東井七月壬申月入南斗丁亥掩太白於柳八月壬子太白入太微遂犯左右執法九月丙子月掩昴三年二月己酉掩心前星二月戊午熒惑入東井三月乙酉入輿鬼五月辛酉太白犯輿鬼庚午月犯心中星甲寅太白犯右執法七月乙丑月掩心前星十月辛卯太白犯南斗四年二月丁卯月掩歲星於畢三月乙酉掩東井七月乙未月犯熒惑占曰貴臣死八月壬申熒惑犯

鉞遂入東井十月戊午辰星入南斗魁中占曰大赦
五年春木當王而歲星小闇無光占曰有大喪二月壬
申熒惑入輿鬼四月太白入輿鬼五月辰星見於七星
色赤如火七月乙酉月掩歲星

武宗會昌元年閏八月丁酉熒惑入輿鬼中占曰有兵
喪十二月庚午月犯太白於羽林 二年正月壬戌掩
太白於羽林六月丙寅太白犯東井十月丙戌月掩歲
星於角 三年三月丙申又掩歲星於角七月癸巳熒

惑入東井色蒼赤動搖井中八月丁丑犯輿鬼十月壬午晝月食太白於亢 四年二月歲星守房掩上相熒惑逆行守軒轅四旬乃去庚申月掩畢大星十月癸未太白與熒惑合遂入南斗 五年二月壬午太白掩昴五月辛酉入畢口八月壬午犯軒轅大星九月癸巳熒惑犯太微上將 六年二月丁丑犯畢大星丁亥月出無光犯熒惑於太微頃之乃稍有光遂犯左執法丙申掩牽牛南星遂犯歲星牽牛揚州分

宣宗大中十一年八月熒惑犯東井

懿宗咸通十年春熒惑逆行守心

僖宗乾符二年四月庚辰太白晝見在昴 三年七月

常星晝見 四年七月月犯房 六年冬歲星入南斗魁

中占曰有反臣 光啟二年四月熒惑犯月於角 文

德元年七月丙午月入南斗八月熒惑守興鬼占曰多

戰死

昭宗龍紀元年七月甲辰月犯心 乾寧二年七月癸

亥熒惑犯心 光化二年鎮星入南斗 三年八月壬

寅太白應見在氐不見至九月丁亥乃見是謂當出不

出十一月丁未太白犯月因晝見 天復元年五月自

丁酉至於己亥太白晝見經天在井度十月大角五色

散搖煌煌如火占曰王者惡之 二年五月甲子太白

襲熒惑在軒轅后星上太白遂犯端門又犯長垣中星

占曰賊臣謀亂京畿大戰十月甲戌太白夕見在斗去

地一丈而墜占曰兵聚其下又曰山摧石裂大水竭庚

子辰星見氐中小而不明占曰負海之國大水是歲鎮
星守虛三年二月始去虛十一月丙戌太白在南斗去
地五尺許色小而黃至明年正月乃高十丈光芒甚大
是冬熒惑徘徊於東井間久而不去京師分也 三年

八月丙午歲星在哭星上生黃白氣如字狀 天祐元

年二月辛卯太白夕見昴西色赤炎燄如火壬辰有三
角如花而動搖占曰有反城有火災胡起六月甲午太
白在張芒角甚大癸丑勾己犯水位自夏及秋大角五色

散搖煌煌然占同

梁太祖開平二年夏四月辛丑熒惑犯上將 乾化二年正月熒惑犯房第二星戊申月犯心大星四月甲寅月掩心大星五月壬戌熒惑犯心大星去心四度順行心帝王之星其年六月五日帝崩

梁主瑱貞明四年十二月鎮星犯文昌上將

後唐莊宗同光二年八月熒惑犯星九月熒惑在江東犯第一星是年大水 三年丙申熒惑犯上相四月甲

子熒惑犯左執法六月丙寅歲星犯右執法

明宗天成元年四月庚戌金犯積尸七月己未月犯太白乙丑月入南斗魁八月癸卯太白犯心大星乙巳月犯五諸侯辛亥熒惑犯上將九月丁巳月犯心大星己巳月犯昴庚午熒惑犯右執法己卯熒惑犯左執法十月戊子熒惑犯上相丙午月掩左執法十一月丁丑月暈匝火木戊寅月犯金木土十二月熒惑犯氐乙巳月掩心庶子二年二月辛卯熒惑犯鍵閉三月月掩鬼

已巳熒惑犯上相乙亥月入羽林四月丁亥月犯左執法癸卯月入羽林六月辛丑熒惑犯房庚子月犯五諸侯九月壬子歲犯房庚申月入羽林壬申月犯上將十月壬午月犯五諸侯十一月乙卯月入羽林三年四月丁酉月犯五諸侯五月丁巳月掩房距星六月乙酉月掩心庶子癸巳月入羽林七月月入南斗魁閏八月熒惑犯上將戊申月犯南斗乙卯熒惑犯右執法庚戌太白犯右執法十一月月掩軒轅大星乙未太白犯鎮

月掩房十二月熒惑犯房 四年正月癸巳月入南斗
魁二月月及火土合於斗三月歲犯牛七月丁丑月入
南斗九月丙子熒惑入哭星 長興元年六月乙卯太
白犯天鐔八月己亥月犯南斗乙卯月犯積尸十一月
熒惑犯氐十二月熒惑犯天江 二年正月太白犯羽
林庚辰月犯心距星二月丁未月犯房四月熒惑犯羽
林八月丁巳辰犯端門十一月丙戌太白犯鍵閉 三
年四月庚辰熒惑犯積尸九月庚寅太白犯哭星十一

月己亥太白犯壘壁 四年九月辛巳太白犯右執法
六月甲戌太白犯右執法

晉高帝天福元年三月熒惑犯積尸 三年五月壬子
月犯上將 四年四月辛巳太白犯東井北轅甲午太
白犯五諸侯五月太白犯輿鬼中星九月癸未月掩畢
六年八月辛卯太白犯軒轅九月己卯熒惑犯上將
八年八月丙子熒惑犯右掖十月丙辰熒惑犯進賢
十一月犯房

出帝開運元年二月壬戌太白犯昴己巳熒惑犯天鐮
四月太白犯五諸侯七月月犯熒惑壬午月入南斗庚
寅月太白犯東井八月甲辰熒惑入南斗九月丙子月
入南斗庚寅月犯五諸侯十月癸卯月入南斗十一月
辛巳月犯昴二年七月月犯角壬寅月犯心前大星
庚戌歲犯井鉞八月中戌歲犯東井九月己酉月犯昴
甲寅太白犯南斗魁十一月太白犯哭星癸丑月掩距
星戊午月犯心後星

漢高帝天福十二年十月己丑太白犯亢距星十一月
月犯昴乙亥月掩心大星己卯月犯南斗

隱帝乾祐元年四月月犯南斗乙未月入南斗七月月
掩心庶子星八月鎮犯太微西垣戊戌歲犯右執法九
月月掩鬼十月歲犯左執法二年六月壬午月犯心
丙戌月犯天關八月乙亥月犯房次將九月壬寅太白
犯右執法辛酉鎮犯右執法甲寅月犯昴三年二月
月犯昴六月鎮犯左掖七月熒惑犯司怪八月太白犯

房庚戌太白犯心大星十月月犯心大星

周太祖廣順元年二月歲犯咸池己未熒惑犯五諸侯
三月歲守心己卯熒惑犯鬼壬午熒惑犯天尸四月歲
犯鉤鈴 二年七月熒惑犯井鉞八月熒惑犯天鐔九
月熒惑犯鬼庚辰太白掩右執法十月太白犯進賢
三年四月熒惑犯靈臺五月熒惑犯上將丙申熒惑犯
右執法七月月犯房

世宗顯德六年六月熒惑與心大星合度光芒相射其

月帝崩先是熒惑勾已於房心間凡數月至上臨崩之前一夕與心大星合度是夜方順行

宋太祖建隆元年正月甲子太白犯熒惑於婁十月壬申又犯於軫占曰荆楚有兵時李重進以揚州叛討平之癸卯熒惑犯進賢十一月犯氐占曰後宮災明年昭憲皇太后崩三年十月熒惑犯氐占曰後宮災明年孝明皇后崩十二月熒惑入天鉤月入南斗魁占曰大臣憂踰年宰相范質王溥魏仁浦罷開寶五年二月

熒惑退入太微上相明年宰相趙普出鎮

太宗太平興國八年三月己巳熒惑犯歲星占云有赦
九年七月月犯五諸侯第三星占曰諸侯有誅責九
月丁未月犯南斗魁甲子又犯昴占曰胡不安十一月
戊戌太白入氐占曰有兵次年河北用兵 端拱元年
十二月熒惑犯亢第二星占云大臣憂又曰鄭旱明年
京輔少雨 淳化元年七月月犯畢占云陰國憂又主
霖雨 二年正月丙戌熒惑犯房第一星占曰大臣憂

其年宰相呂蒙正樞密使王顯參政王沔陳恕罷 四
年四月熒惑入羽林占云主有兵明年李繼隆擒趙保
忠王繼恩平李順十月太白犯南斗魁占云將相憂明
年右驍衛大將軍張遜卒其年冬宰相李沆參政賈黃
中同知樞密院溫仲舒罷 五年十月熒惑入氐犯西
南星占云后妃大臣憂明年孝章皇后崩十一月乙卯
月犯畢大星占云五日內有雨雪之應 至道三年九
月癸未月入軒轅占曰宮中有憂明年秦國成聖繼明

夫人薨

真宗咸平元年六月壬辰月入太微占曰大臣有憂是
年冬宰相呂端參政溫仲舒罷庚戌歲星入氐占曰氐
為路寢王者宿宮歲星三入天子當將兵於野明年契
丹犯塞車駕幸河北七月癸酉太白犯角左星占曰有
兵戰不勝將軍憂踰年敵寇河間副都部署康保裔戰
死二年正月己卯月入南斗魁占曰吳分饑疫明年
兩浙大饑民疫死十月癸亥月犯昴占曰匈奴受兵明

年范廷召大破契丹於黃州東八月甲子熒惑犯輿鬼
占曰執法憂明年御史中丞趙昌言等貶十月丙午太
白入南斗占曰丞相憂明年宰相向敏中罷乙卯月犯
五車占曰主兵起路壅塞其年遷賊大擾靈州陷閏十
二月月犯角大星占曰主大戰明年遷賊圍麟州擊敗
之五年八月熒惑犯房占曰將相憂明年宰相呂蒙
正罷十二月甲申月掩心前星占曰月數犯心後星復
掩前星皇太子憂明年周王薨又皇太子生兩月不育

六年正月辛亥月犯房上將次將心小星占曰將臣
死其年戎寇南牧副都部署王繼忠戰歿四月太白犯
輿鬼占曰大臣有薨黜者是秋亢王薨十一月甲辰熒
惑犯太微上相占曰上相憂明年宰相李沆卒 景德
元年六月月犯昴占曰匈奴受兵戊寅又犯五車東南
星占曰兵起七月乙巳熒惑犯氐占曰天子親征是冬
契丹來寇上勞軍於澶州閏九月太白犯南斗占曰外
國有使至又曰有赦令其年契丹使來求和赦河北

二年六月月犯南斗占曰大臣死其年宰相畢士安薨
九月丁未熒惑太白犯太微上相占曰丞相有免者明
年宰相寇準罷 三年九月戊子辰星晨見東方在亢
太白又見西方在尾占曰金水各一方主有兵不戰

大中祥符元年七月己未歲星在太微占曰將相憂明
年殿前都指揮使劉謙卒 二年九月月入東井占曰
有大水明年夏京師大水壞廬舍十月鎮星犯進賢占
曰卿相憂明年節度使同平章事石保安定郡公惟

吉卒丁酉月犯畢占曰北國憂踰月契丹母卒 三年

三月鎮星犯進賢占曰卿相憂明年參政馮拯罷四月
歲星退行入氐丙午又守氐占曰主饑疫明年江淮饑
壬戌太白犯建星占曰大臣有出者明年參政趙安仁
罷 五年十月太白犯箕占曰後宮有大慶其年立皇

后閏月熒惑在諸王北占曰侯王憂踰年舒王薨 六
年四月甲辰昏度月犯南斗占曰大臣憂明年樞密使
王欽若陳堯叟副使馬知節罷 八年二月熒惑犯五

諸侯占曰侯王憂其年榮王元儼降封端王閏六月月
犯鍵閉占曰將相災明年天平節度周瑩卒樞密使同
平章事陳堯叟罷九年十二月月入太微占曰大臣
憂明年參政王曾罷天禧元年二月鎮星犯建星占
曰大臣憂其年太尉王旦薨八月太白犯房次相占曰
將相有大憂明年徐王薨十月月入太微端門占曰大
臣憂明年參政張知白罷十一月又犯太微上相踰年
宰相王欽若罷二年正月月犯南斗距星占曰德令

下其年立皇子大赦六月月犯房占曰房中道也月行
中道天下和平 三年五月鎮星犯牽牛占曰有土功
其年河決滑州大興役徒塞之十月太白犯進賢占曰
卿相有憂明年宰相向敏中卒十一月月入太微占曰
大臣憂明年宰相李廸罷 四年二月月犯箕占曰有
大風其年四月西北大風起飛沙折木晝晦數刻四月
月掩房次將占曰臣下有憂宜察邪亂之臣不然有暴
兵戊戌又掩南斗魁占曰將相有憂其年宰相寇準罷

五月癸亥又掩日後星占曰臣下災有陰謀是年周懷政謀亂覺伏誅

仁宗乾興元年三月木犯房占云秋多雨水四月月犯南斗魁第二星占曰宜謹關梁察姦詐將帥有憂十一月月犯五車占曰有兵疫事 天聖元年五月月掩房占曰次將災九月火犯壘壁陣占曰將兵者有災 二年二月月犯鬼因掩積尸十一月火犯房 三年正月火犯天鐮五月金犯太微上將七月月犯房十一月火

犯外屏 四年二月火犯天高十月月犯東井占曰冬

多雨雪春多雨水 五年九月金犯靈臺占曰日官失

職水旱失時乙巳金犯明堂占曰天子易宮宜避正殿

正寢以順天道十月月犯牽牛中星占曰牛疫犧牲之

官有憂 六年正月甲寅日官言熒惑行近天街當犯

而不犯請宣付史館從之六月月犯氐占曰兵饑刑失

中八月木犯鉞十月月犯東井 七年六月月掩畢八

月木犯輿鬼 八年正月火犯東井占曰秦分小兵作

欽定四庫全書

文獻通考
卷二百八十九

四月木犯鬼尸九月木犯軒轅十月月掩畢第二星

九年九月火犯輿鬼十一月月掩畢 明道元年二月

庚午金犯五車六月金犯東井光相接八月金掩軒轅

左角十一月月犯謁者 二年二月月入畢口九月月

入太微十月金犯南斗 景祐元年正月木犯東咸五

月火犯右執法七月月犯南斗十一月月犯房 二年

三月金犯東井四月犯五諸侯七月火犯靈臺十一月

金入氐 三年正月火犯進賢六月月犯氐八月月犯

南斗 四年六月金犯東井七月金犯軒轅大星十月
土犯左執法 寶元元年正月火犯房四月月犯角九
月火犯天雞 二年五月月犯心大星十月犯南斗
康定元年正月火犯建星六月木犯井鉞七月木犯東
井十一月月犯軒轅御女 慶歷元年正月月犯房次
將六月犯東井七月月掩斗天相十一月木退犯輿鬼
占曰秦分饑 二年二月月犯輿鬼四月木犯鬼尸
三年五月金犯軒轅大星九月木犯左執法 四年二

月木犯左執法七月月犯東井 五年二月火犯東井
五月犯軒轅大星十二月月犯房上相 六年七月金
犯左角十一月月犯畢距星 七年正月火犯五諸侯
六月土犯建八月月犯畢大星 八年二月金犯五車
東南星六月月犯畢八月火犯鬼尸十一月月掩畢

皇祐元年二月又掩畢五月火犯右執法九月金犯斗
天相十一月月掩畢 二年三月月犯軒轅大星八月
月入東井十一月月犯畢入氐占曰水蟲多死 三年

三月月犯畢四月月入太微占曰貴臣失勢八月火犯
天江 四年正月月犯東井占為風雨之候及水官有
黜者八月犯輿鬼十月金犯南斗占曰兵起 五年六
月金犯井鉞閏七月火犯天江占曰旱饑 至和元年
十一月火犯亢 二年九月犯壘壁陣 三年二月月
犯氐占曰氐為宿宮月犯之郎將有咎四月金犯畢占
畢為邊兵七月月犯南斗占南為天廟丞相太宰之位
今月宿魁中犯之大臣具有咎風雨則解 嘉祐元年

十月金入氐占曰天下疫 二年三月火犯壘壁陣占
曰有兵四月月犯心占大臣有憂八月水犯氐占曰有
赦令 三年二月月入魁占曰大臣辱又曰宮中有盜
賊四月月犯五諸侯東星占曰將相憂九月月掩箕占
曰箕為後宮亦曰天雞主八風今月犯之宜明號令及
後宮政教亦主大風十一月火犯鈞鈴占曰大臣有咎
四年正月木犯建占曰建六星在南斗東北天之都
宮主謀議木犯之大臣相譖宜察臣下之不和者四月

月掩昴占曰胡地有災七月火犯畢距星占曰刑罰用
趙分有冤獄又主戰事十月火犯月星占曰主兵亂

五年三月月犯南斗距占曰風雨不時四月月掩輿鬼
西北星占曰鬼天目也以視察姦謀其西北星為金玉
之積今月掩之寶貨出紀彈之官災秦地侯王有憂七
月木退犯十二諸國代星占曰主其地有兵災十月土
退犯東井距星占曰民多疾病 六年正月月掩心大
星六月金犯畢距星占曰邊兵動大將危屬趙冀之分

宜備河北七月月掩心大星占曰心大辰海內之主宜
寅奉天道崇德以禳之十月火退犯五諸侯占曰大謀
變不成 七年三月火犯輿鬼西北星占曰有天下有
兵喪忠臣憂五月火犯靈臺占曰日官有咎八月土入
鬼占曰大臣憂十一月金犯罰星占曰刑罰有所未中
八年二月月犯東井占曰為水事六月火犯諸王占
曰宗室諸王有咎七月月犯牽牛占曰牛多死將軍有
憂馬暴貴十二月火犯軒轅占曰後宮有憂

英宗治平元年正月月掩天闕占曰司闕津者有罪邪
臣有欲更變天子法令者閏五月木入東井占曰暴雨
害黍稷及有川瀆之事七月金犯輿鬼占曰兵革動孕
婦多損屬秦分十月金入氐占曰霜不時春糴貴宋分
疫 二年正月月犯左角占曰鄭分兵旱四月木犯天
鐸占云主憫育孤民憐給衣食之事七月火犯鬼鎖占
曰主兵賊動秦分災十月月犯牽牛中星 三年三月
火犯太微西垣上將占曰將相有憂四月犯右執法九

月木犯靈臺占曰候天文災變者當其咎十月犯太微
西垣上將占曰不利總兵者

月犯五緯

宋太祖建隆二年十一月癸未犯歲星 開寶三年九
月乙卯犯鎮星

太宗太平興國三年七月己亥掩熒惑八月甲戌與太
白合 八年七月辛亥凌犯歲星 端拱元年二月戊
申犯鎮星辛亥犯歲星六月丁卯掩鎮星 淳化元年

十一月丙申與熒惑合 二年六月己丑犯歲星 三
年三月癸亥與太白合九月戊午掩熒惑十二月甲申
與熒惑合 四年十月癸未與辰星合 五年十月己
亥犯歲星 至道三年八月戊申犯鎮星十二月癸丑
犯歲星

真宗咸平元年三月乙丑犯熒惑五月己巳掩歲星十
二月甲午犯鎮星 二年二月戊子犯太白十一月乙
未犯熒惑 三年二月壬子犯太白 四年十月辛酉

掩熒惑 五年二月癸巳犯歲星 六年十一月癸卯

犯鎮星七月庚午犯歲星 大中祥符二年十一月丙

子又犯 三年十月丙辰犯熒惑 四年正月丁丑犯

太白二月壬辰犯鎮星八月丙寅犯太白 五年三月

癸未犯鎮星 六年二月丙戌犯歲星 七年十二月

丁丑犯鎮星四月丙辰掩熒惑八月癸未犯鎮星 九

年五月己巳犯歲星十月戊戌犯太白十二月丙戌犯

熒惑 天禧元年正月戊申犯歲星 三年四月乙未

犯熒惑相距五寸許九月巳卯犯歲星七月辛亥犯太白八月庚子犯熒惑 五年五月辛卯犯鎮星

仁宗天聖三年正月丁未月犯火 五年七月巳未犯

木八月丁亥犯火十一月戊申掩木 六年九月巳酉

犯土 明道元年九月戊子又犯土 景祐二年四月

丁巳掩金 五年三月戊申入太微犯土四月庚寅犯

木 慶歷元年八月庚子掩土十月丙申犯土 四年

七月壬午犯火 六年三月丙申犯木七月乙酉又犯

木 皇祐元年七月丙午又犯木 二年六月壬申犯
土 四年十月己丑犯木 至和二年五月庚辰犯土
十月己酉犯木十二月辛卯犯土光芒相接甲辰掩木
三年三月丙寅又掩土閏三月癸巳又掩木五月戊
子犯土 嘉祐二年四月庚申犯火六月戊申犯金乙
卯犯火 四年五月丁酉犯金占曰強國作難十月甲
戌犯火十二月庚午掩火 五年三月甲午掩火在井
七度半占曰憂在宮中又輔相死 六年閏八月辛丑

犯土在井十七度占曰女主憂後宮有出者十一月癸亥又犯土占曰後宮憂秦分民流 八年七月壬戌掩木在畢五度十一月辛亥又掩木



文獻通考卷二百八十九